

րին, որոնց մշտական հովանավորության և աջակցության շնորհիվ այսօր ճեմարանում բազմաթիվ նորոգություններ ու շինարարական աշխատանքներ են կատարվում՝ ի վայելումն հնդկահայ համայնքի և Մարդասիրական ճեմարանի:

Ներկաներին խոսքով դիմեց նաև ճեմարանի նոր տնօրեն տիար Սումիթրա Մալիկը: Նա խոստացավ իր ամբողջ կարողությունը, մասնագիտական ավյունը և տարիների փորձառությունը ներդնել՝ Մարդասիրական ճեմարանի կրթական կյանքն առավել առաջ մղելու համար:

Տնօրենի խոսքից հետո տեղի ունեցավ նվերների ավանդական բաշխումը, որի ընթացքում պարզևատրվեցին ուսումնառության և կարգապահության ասպարեզում լավագույն արդյունք ցուցաբերած ճեմարանականները: Նվերները հանձնեց Կալկաթայի եկեղեցական խորհրդի ատենապետ տիար Հայկ Սուքիաս Կրտսերը: Այնուհետև ճեմարանի ավարտական՝ 10-րդ դասարանի շրջանավարտների համար նախատեսված հատուկ հուշանվերները նրանց հանձնեց եկեղեցական խորհրդի փոխատենապետ տիար Սունիլ Սոբթին:

Հանդիսության երկրորդ մասում ճեմարանի երաժշտության ուսուցիչ Վաչագան Թադևոսյանի ղեկավարությամբ ելույթ ունեցավ ճեմարանի երգչախումբը՝ կատարելով ինչպես հայ, այնպես էլ օտար կոմպոզիտորների ստեղծագործություններից: Ճեմարանականները նաև իրենց հմտությունները ցուցաբերեցին ասմունքի, երգի և պարի ասպարեզներում՝ ներկայացնելով ժամանակակից և հնդկական ազգային պարային կատարումներ: Ճեմարանականները ներկաների ուշադրությանը հանձնեցին նաև փոքրիկ ներկայացում անգլերեն լեզվով:

Վերջում հանդիսությունն ամփոփեց և օրհնության ու գնահատանքի խոսքով հանդես եկավ ճեմարանի կառավարիչ Հայր Սուրբը:

Հիմնադրման օրը նշանավորվեց նաև երկար սպասված մեկ այլ միջոցառմամբ: Կալկաթայի եկեղեցական խորհրդի փոխատենապետ տիկին Սյուզան Ռուբենը կտրեց ցածր դասարանների տղաների համար նախատեսված հիմնովին վերանորոգված և կահավորված ննջարանային մասնաբաժնի ժապավենը: Բացվեցին նաև նոր վերանորոգված հիվանդանոցային բաժինը և վերակացուի համար նախատեսված առանձնասենյակը:

Վերջում տեղի ունեցավ հյուրասիրություն:

ՀԱՅՈՑ ՄԵԾ ԵՂԵՌՆԻ ԶՈՀԵՐԻ ՀԻՇԱՏԱԿԻ ՈԳԵԿՈԶՈՒՄԸ ՀՆԴԿԱՀԱՅ ՀԱՄԱՅՆՔՈՒՄ

Ապրիլի 24-ին՝ 1915 թ. Հայոց Մեծ եղեռնի զոհերի ոգեկոչման օրը, ողջ հնդկահայոց համայնքը և Կալկաթայի Հայոց Մարդասիրական ճեմարանի սաները ուսուցիչների հետ միասին այցելեցին Կալկաթայի հայկական Սուրբ Նազարեթ եկեղեցի, որի հարևանությամբ ի հիշատակ Մեծ եղեռնի նահատակների կանգնեցված է Աղոթքի և ուխտի հուշաքար: Հուշաքարի մոտ ծաղկեպսակներ զետեղելուց հետո մեկ րոպե

լռությամբ հարգանքի տուրք մատուցվեց Ցեղասպանության զոհերի հիշատակին, ապա գլխավորությամբ Մայր Աթոռ Սուրբ Էջմիածնի միաբան Հարություն սրկ. Համբարձումյանի կատարվեց Հոգեհանգստյան արարողություն՝ ի հիշատակ 1915 թ. Մեծ եղեռնի անմեղ նահատակների: Արարողության ավարտին բոլոր ներկաները գլուխ խոնարհեցին և ծաղիկներ դրեցին հուշաքարին:

Արարողությանը ներկա էին հնդկահայոց եկեղեցական խորհրդի անդամներ, ճեմարանի դասախոսական կազմը, համայնքի ներկայացուցիչներ, հյուրեր և սաներ:

ՇԱԽՄԱՏԻ ԳՐՈՅՄՄԱՍՏԵՐ ՍՄԲԱՏ ԼՊՈՒՏՅԱՆԸ ԿԱԼԿԱԹԱՅԻ ՀԱՅՈՑ ՄԱՐԴԱՍԻՐԱԿԱՆ ՃԵՄԱՐԱՆՈՒՄ

Ապրիլի 3-ին Կալկաթայի Հայոց Մարդասիրական ճեմարանում հյուրընկալվեց Հայաստանի Հանրապետության շախմատի ակադեմիայի հիմնադիր նախագահ, Օլիմպիական կոմիտեի և Ակադեմիայի հոգաբարձուների խորհրդի անդամ, գրոյսմաստեր Սմբատ Լպուտյանը: Նա օրերս պաշտոնական այցով գտնվում էր Հնդկաստանում՝ մասնակցելու Կալկաթա քաղաքի շախմատային բաց առաջնությանը: Օգտվելով պատեհ առիթից՝ Ս. Լպուտյանն այցելեց նաև Հայոց Մարդասիրական ճեմարան, ուր հանդիպեց ճեմարանի սաներին և ուսուցչական կազմին: Ճեմարանականները մեծ ոգևորությամբ ընդունեցին նշանավոր հայ շախմատիստին: Հնդկահայոց հոգևոր հովիվ և ճեմարանի կառավարիչ Տ. Օշական վրդ. Գյուլգյուլյանը, ջերմորեն ողջունելով պատվավոր հյուրին, նշեց, որ ճեմարանականները սրտի տրոփյունով էին սպասում այս հանդիպմանը: Այնուհետև Ս. Լպուտյանը ողջունեց ճեմարանի սաներին և խոսեց Հայաստանում շախմատի զարգացման հեռանկարների մասին: Ճեմարանականների խնդրանքով նա նաև անդրադարձավ մարզական իր հարուստ կենսագրությանը և սիրով պատասխանեց նրանց հուզող բազմաթիվ հարցերի: Ի պատիվ հյուրի՝ ճեմարանականները հանդես եկան նաև գեղարվեստական հայտագրով: Վերջում Ս. Լպուտյանը շրջեց ճեմարանում, ծանոթացավ ճեմարանի պայմաններին և առօրյային և մտերմիկ զրույց ունեցավ սաների հետ:

*ԴԻՎԱՆ ԿԱԼԿԱԹԱՅԻ ՀԱՅՈՑ
ՄԱՐԴԱՍԻՐԱԿԱՆ ՃԵՄԱՐԱՆԻ*